

О Дујто Послание е Јованескоро

Поздрав

1 ¹ Таро старешина, џики избирими госпоѓа хем олакере чхаве, кој мангавален ко чачипе, хем на само ме, него хем сарине, кој пенџарге о чачипе, ² баши о чачипе, со ачхола ки аменде хем со ка овел аменџар довел. ³ О благодат, о милост хем о мир ка овен аменџар таро Девел о Дат хем таро Господари о Исус Христос, о Чхаво е Дадескоро, ко чачипе хем мангипе.

О заповед е мангипаскоро

⁴ Бут радујнѓума соске машкар те чхаве аракхљум асавке, кој џана ко чачипе, сар со примингем заповед таро Дат. ⁵ Хем акана молинаватут госпоѓо, на сар те пишинава туќе неви заповед, него окоја со исиамен таро почеток: те мангамен јек јавереја. ⁶ А мангипе тано акава: те џа според Олескере заповедиа. Одојај тани и заповед, сар со шунген таро почеток, ки која требела те џан.

Пазинен тумен

⁷ Соске бут измамниќа иклиле ко свето, кој на исповединена дека о Исус Христос ало ко тело; одовај тано измамнико хем антихрист. ⁸ Пазинен тумен тена нашавен окова со печалингемле, него те приминен цело награда. ⁹ Секој, кој џала надарик хем на ачхола е Христоске ки наука, наеле е Девле. Кој ачхола е Христоске ки наука, оле исиле хем е Даде хем е Чхаве.

¹⁰ Ако некој ало ки туменде хем на анела акаја наука, ма приминенле ко кхер хем ма поздравиненле; ¹¹ соске кој поздравинелале, учествинела ко олескере билачхе дејља.

Поздравиа

¹² Исиман бут те пишинав туменге, ама на мангава лилеја хем мастило, него надинавама дека ка авав туменге хем усно те ќерав лафи туменџар, за да те овел амари радост пхерди. ¹³ Поздравиненатут о чхаве тари ти избирими пхен. Амин!